

編號 1 號

【自家大齊家】林伯殷原作

該個人係哪儕？仰會電視逐日有佢个新聞？仰會有恁多人請佢簽名？仰會有恁多人聽佢演講？係哪齣電影个明星？係哪個有名个歌星？抑係哪種職業運動个球星？全毋係。佢係一間有名公司个執行長，來臺灣摻大家分享人工智慧个發展，同時，乜有其他重要晶片公司个執行長，來參加臺北電腦展个活動。仰般佢兜會跔跔對外國來到臺灣呢？當然有理由啊！該就係，臺灣有全世界最先進、最完整个晶片製造系統。

在世界晶片个分工系統肚，臺灣最強个部分係晶片製造，差毋多，最新設計个晶片，全部係交分臺灣來生產。現代晶片个發展係越做越幼秀，功能越來越強。晶片製造公司為著愛開發新个製造技術，輒輒會投資大量資金，集合幾下百、甚至幾下千個半導體專業人才來做研究，就係講，愛大齊家為共同个目標來打拚，正有法度做得著，這摻單淨倚恃自家煞猛做頭路來講，有當大个爭差。

所以，有名个晶片公司執行長毋會斯強調自家公司產品个成功定定，還會記得承蒙好得有臺灣恁湛斗、恁有紀律个晶片生產

團隊來幫襯。見擺上下班時間，睭著該恁多在科學園區來來去去个人，就知，係無大齊家个努力，臺灣仰會有恁好个晶片製造能力，仰會受著國際个恁多肯定。

隨等晶片个用量緊來緊大，恁多年來，幾多原旦係客家人耕種个山林、田坵既經變做電子廠摻大樓，想睭一下頭播播做事个農家人，來思念自家个長輩就無恁該。毋過，這種自家認分，頭播播摻事情做好，堅耐个精神，對農業時代變到資訊時代後並無失忒去，像人乜毋識離開過原來个所在，到今，還係日合夜繼續留在該廠房裡肚。這兜晶片公司執行長認為：臺灣人自家堅耐个傳統，就係臺灣晶片製造个正經基礎。

現代工業產品已經離毋開晶片了，臺灣个晶片公司乜有去到美國、日本、德國等先進國家設廠，偲俚个工程師跔等去到了世界各地，大齊家摻晶片製造技術傳揚出去个時節，乜分人更加有機會做得來感受著臺灣人自家个堅耐精神。

編號 2 號

【坐米籬沾屎脰】徐姿華原作

頭擺，阿爸在溪埔有一埕地，種枇杷膠鸚哥桃，還有幾下個莊肚个阿叔、阿伯也在該種兜楊桃、葡萄、李仔這兜。

溪壩个枇杷園較平洋、好做事，毋過，愛去溪壩園還有一項挑戰，斯係愛坐流籠過溪壩；溪壩水大又急，有三、四十公尺闊，這兜阿叔、阿伯也識探過幾下到竹笕橋，毋過，毋使幾久斯會分水打走。高不將，大家出錢出力拉一條鋼索做流籠，正起勢係用大米籬編麻索，過秦鉛線圈做流籠，還愛用人拉；包尾，正改用電動个白鐵籃流籠。

第一擺坐流籠又驚又好，阿爸先溜過溪埔該頭，阿姆膠流籠拉轉來，揪核索喊佢入米籬肚坐好，過膠做事愛用著个傢啦伙、水膠飯包，做下放入米籬肚，斯膠阿爸攞手，順勢膠米籬撻出去。該流籠溜當遠，一下斯溜到溪壩中央，佢著驚下「噉」到大嫲聲，阿爸續等緊出力擲，膠佢擲到佢个身邊。等嚇到面壜青个佢踏出米籬，過膠東西提拏了後，換阿爸膠阿姆攞手，阿姆將流籠拉轉去，正坐等流籠膠阿爸兩片搵拉，當遠斯過溪壩了。

萬事起頭難，有經驗了，佢个膽斯較在了，曉得享受坐流籠

个趣味了！該咻聲下，斯溜到一、二十公尺遠个刺激，好比這下个雲霄飛車；去溪壩園搵手，有好坐兩擺个流籠，這係分佢最好个獎勵。

熱天个下晝頭，輒輒會落風時雨，雨若較早落，佢兜斯歇睏下等雨停再過做，若雨較暗正落，阿爸斯會放工轉早夜。有一擺，四點空落大雨，阿爸睏做毋成事了，斯喊大家收收仔，愛轉了！

去到流籠頭，堵著核等葡萄个阿平叔，地泥下還放一擔，佢本來按算自家拉四擺流籠，膠葡萄載轉屋下，熱心个阿爸斯膠佢搵手，一儕膠一籠葡萄共下坐過溪壩。雨緊落，溪壩水緊漲起來，大人企在大米籬肚緊拉索過溪；換佢愛過溪壩了，阿姆喊佢愛坐好。到溪壩中央，該水嘎浸著米籬底，佢个屎脰一下斯沾著該冷冷涼涼个溪壩水。睏等該黃泥色个水浪拋等來，實在當得人驚，佢忍等毋敢嘍，當無簡單正耐到岸脣。

這下想起該坐米籬沾屎脰个事，好笑又心酸。阿姆講該量時，在流籠頭拉等索等人个佢，又驚佢分水打走，強強忍到敲忒一層皮了呢！

編號 3 號

【目汁个故事】徐秀英原作

該日下晝，睺著一張畫錫人个圖像——顯微鏡底下个目汁花。逐張目汁花睺起來就像一隻細星球，頂高个花紋逐粒就無共樣，有像雪花形个，有像石英結晶體个，乜有像虐毛蟲个，又神奇又得人惜。翕相个作者講，逐粒目汁，目珠睺起來都係晶晶亮亮，毋過在顯微鏡底下，喜愁悶樂个情緒變化都會轉做無共樣个目汁花。對睺著這篇文章後，佢逐擺睺著人出目汁，就會緊想該後背个故事。

佢係一個「已肯嘍」个人，歡喜會流目汁、感動會跌目汁、當悶个時節會嘍、悲傷个時節會大嘍。屋下人輒常笑佢，目珠有安水龍頭，一擰開就嘩啦啦緊流。人難免會有嘍垂垂¹个時節，就像有一擺用電腦打報告，作業速度一路開青燈，就在會完成个時節，電腦嘎當機，睺等烏疏疏个螢幕，就像佢烏頹頹个失落心情；等到再開機，資料淨伸一半，該量時就恁樣目金金仔，睺著在三更半夜，歸屋下人睡到當落覺，伸佢緊擘嘴、緊流下無奈何个目汁。

目汁係佢俚摻外界聯絡情感个一種表達方式。所以，所有个關愛、期盼、悲傷、感動，抑係夢想个故事，都做得真實傳達。在佢俚个生活裡背，輒常乜會在車頭抑係機場，睺著一幕幕無共樣个場景。該片有人送別親人遠去他鄉，離别个目汁張等思念摻期待，又還有較多个係放毋下摻毋盼得；這片有人捕等轉來个好朋友，該歡喜个目汁裡背，恁恁都係再次見面个快樂摻幸福。佢想，目汁毋單淨係情感个出口，還有一種無形个力量，佢做得穿過時空，傳達溫暖摻勇氣分思念个人。逐滴感動个目汁，都係關愛个力量摻信念。

還細時節，自家常會用使性、打潑犁，去得著想愛个東西。阿姆講，目汁毋係武器，乜不應該係手段。這下佢知了！目汁係珍珠、係鑽石、係親戚朋友無價个愛。

¹ 嘍垂垂：音 vo` sui sui / vo` sui` sui`；形容哭泣不止。

編號 4 號

【 岔東岔西 】徐汎平原作

記得讀小學該下，日日就摻爽伴仔共下行路去讀書。無多¹半點鐘个路程，細人仔咩！哪有好認分乖乖行？總會搵兜仔齣數來爽。捏花草、拈蟲蛎，該還毋算數²。大路个車仔駛上駛下，佢兜就會睺準車影，等佢一過就跳啊起！哪儕係踏著抑徑著影就算輸，愛分贏个人拘額頭。

放學轉該下，除忒逛入雜貨店買冰食，幾個人還會湊等去行細路仔、行田脣，堵著路口就轉彎、再轉彎，三十分鐘个路，硬硬行忒歸點鐘正轉到屋。大人講：「哼！拈囊蛎、打草蟻，岔東岔西，愛行若³毋行！」佢有行啊！行較久兜仔定。

到大了，不管去到哪隻新城市生活抑遠寮，佢本本當好大街、小巷、細路滿哪串上串下去探路、睺風景。當記得有一擺，自家一儕坐巴士去九份寮，逛過金瓜石黃金博物館，又蹶上長長个礮仔去睺神社个遺跡。九份該最有名个老街鬧熱煎煎，一踏入就摻人尖上尖下相極仔⁴。總算對街尾鑽出來了！心肝肚一息就無

¹ 無多：音 mo doˋ / moˋ doˋ；不多於，即「不到」之意。

² 毋算數：音 m sonˋ siiˋ / mˋ sonˋ siiˋ；不算數，指除此之外，還有更甚之事。

³ 若：音 naˋ / na；好似，此句意為「要走不走似的」。

⁴ 相極仔：音 siongˋ kid erˋ；與人互相推擠。

想再過對原路躡⁵轉去！

這時節，堵好睺著某某步道个牌仔，該無就來去行睺啊好哩！就跔等礮仔上。無想著，一行起勢，嘎行入山肚去了。除忒最先睺著一個像仙人樣个老阿伯、較過兜仔堵著一細陣人，歸隻山林就淨伸著蟲嘍、鳥聲摻微風，還有自家个故氣聲。一下溜崎、一下上崎，遠遠有一細搭頭擺人留下來个屋跡，睺著有兜淒涼。頓腳下來，臥頭睺天，日頭轉影了，這……算來愛行去哪呢？摸等啞啞跳个心肝，到這下正感覺著：「哎哟！膽膽⁶哦！」好得，轉一隻彎，堵著林間个細伯公廟，打幫伯公指路，過無幾久，就行到另外一頭个登山口了。

出啊來，翻轉頭詳細睺告示牌，正知講這條山路安到「小粗坑古道」！盲落山个日頭，摻猴硐國小面前、基隆河兩片脣頭个沙蔗花⁷晟到金若若仔。佢就在這燒暖个冬下頭，踏上像用金仔鋪个大路，一路行到猴硐火車頭。過後，又跔等「貓村」个貓仔遊遊野野一站仔，正甘願坐車轉屋。

哼！岔東岔西，毋行就毋行，一行嘎害人心驚！十年前个戇膽⁸，這下斯毋敢哩！

⁵ 躡：音 liungˋ / liungˋ；竄、鑽。

⁶ 膽膽：音 damˋ damˋ / damˋ damˋ；內心感到怕怕的。

⁷ 沙蔗花：音 saˋ zhaˋ faˋ / saˋ zaˋ faˋ；甜根子草花。

⁸ 戇膽：音 ngongˋ damˋ / ngongˋ damˋ；因為無知、不作多想而有的勇氣。

114 年全國語文競賽臺灣客語朗讀文章高中學生組（饒平腔）

編號 5 號

【聽古】廖惠貞原作

還細時戴姐公屋脣，跔等阿太、阿嬪行。阿太成時會帶一、兩個息嫲坐三輪車轉去海口佢个妹家，去漁港攞一大籃个魚仔轉來。無食忒个，舅姆會用鹽滷做鹹魚，做得食幾下日。

還記得熱天食飽夜，在天墀坪，阿姨摺草蓆攤好，交椅、矮凳仔徙好，伙房个叔婆、伯公乜擎等葵扇，出來寮涼。阿太、阿嬪會擘地豆，成時細孺仔乜會搵手。細舅會摺地豆擘一半，夾在偃兜耳砵，做耳環戴，愛靚就毋會試著疾。莊肚一大片係禾頭田，世大人太體會講耕種个事，弓蕉仰般翕分佢熟？洋菇愛仰般浴水？打胎个禾仔嗰分塑膠工廠噴煙，禾串冇忒愛仰結煞？阿三姑婆个豬嫲愛降子囉！無就講頭擺个事，爽寮个細人仔會停下來，耳劇劇仔聽，因為大家就好聽古，尤其係阿定伯公來寮个時節。

有一擺阿太老癩倮，忽然間講愛帶偃兜去海口捉魚仔，堵好該暗晡阿定伯公來寮，佢乜講頭擺戴在新屋永安漁港脣，還細時節，臨暗時輒輒會跔等大人去沙灘拉網捉魚仔，阿公先問：「阿定哥，你兜仰般知愛去拉網呢？」

「有里長伯會歎啲¹啊！」阿定伯公驚大家毋知歎啲个意思，又解釋講：「大螺殼該尾削忒兜仔，對尾大聲歎，就有啲啲啲——一个聲，大細聽著啲聲就遽遽走出來搵手，分做兩片拉網，大聲緊喊『一、二、三，煞力拉！』該搭仔海陸人較多，佢兜講牽畧。」

「阿定伯公，係恁樣拉網無？」細舅當興頭做出拉網動作，大家嘩嘩滾笑。

因為一般客家人戴山町，人講：「逢山必有客，無客不戴山。」雖然還細識去海口漁港，毋過無睭過拉網。阿定伯公講：「偃客家人最擔硬，靠山食山，靠海食海，鄰舍摺屋下人半耕種半打漁，生活還過得去，乜愛靠天公爺摺祖先个庇佑，所以偃客親就尊敬天，感恩田地、大海摺祖先哦！」大家斯聽到當入文。

聽阿定伯公講古，想像佢兜協力耕山打海久遠个古，有節奏个海螺歎啲聲，大家共下出力拉網收魚仔，睭等彩霞染等海面、日頭落海寶，歡喜講笑平分魚仔，家家屋屋就有豐沛个夜，這係頭擺漁村生活幫搵个記憶。聽阿定伯公老頭擺个古，感受著客家硬頸打拚个精神。

¹ 歎啲：音 pun du / pun` du`；吹海螺。

編號 6 號

【柿仔情】徐熏嫻原作

毋多知仔又轉到立秋个節氣，大自然也定定仔換山色。逐年秋天，見睭著山崑背个柿仔漸漸熟水，心肝窟嘎燒暖起來，就像阿爸惜子个心，浸在人生个記憶肚轉紅。

這片柿仔林，係阿爸在厝出世該年在屋後背種个。記得阿爸講：「這兜柿仔樹摺你同年，你幾多歲，柿仔樹就有幾多年哦！」恁想阿爸係仰般用心來耕種，一冬過一冬个凝神，除忒逐年加減有好收成，還供飽一群番綻肚枵个童年。

樹頂个柿仔恬恬仔轉到紅霞色，摺歸頭樹仔染到紅啾啾仔。睭著這兜靚膩膩个紅柿仔懸到高天天个樹頂，隨風搖啊搖仔已打眼，就想著還細時節，兄弟姊妹蹶到樹頂摘柿仔个情景，就像一群細猴仔跋歸樹个心色畫面，一下工歸頭个柿仔總下摘淨淨，半粒就無伸。

阿爸个汗水係有機肥料，正做得打出恁結又大嫻粒个柿仔。這兜柿仔毋單淨錫人食，還特別錫鳥仔無就膨尾鼠來搶食。睭著黏時就有好落嘴个果子嘎分這兜生靈食忒，厝个心肝肚當然係毋願分佢兜來偷食，所以輒常會園到樹頭下逐鳥仔、嚇膨尾鼠。這

兜齣數就變做佢兜細人仔戮力噴天个事。

有一日下晝，睭著阿爸攞等家濟仔就行往柿仔園，緊話著阿爸也愛去嚇鳥仔，就跔等佢个後背尾扭啊扭仔走等去，無想著阿爸提出紙絡仔，摺樹頂大約五股三个柿仔包起來，伸个就留分大自然个動物食。

佢睭到呆忒，阿爸就笑笑仔講：「無相干！人生賺毋足，食毋足。耕種人本旦就愛睭天絡食，有能力種得來食，分一息仔生靈食也係一種福氣！」還毋知頭天个佢哪聽得識麼个係「睭天絡食」，總知該係阿爸透風落雨辛苦守顧正有好食个果子。

柿仔熟水个季節，阿爸嘎無在哩！摺柿仔摘下來袋落袋¹，就想著阿爸分日頭炙到紅紅个面頰卵，該係一種深深个思念。這兜柿仔樹年堵年定定仔老，今這下有鳥仔在樹頂作竇，膨尾鼠還係喀喀滾……湊伴來搶食，睭著萬物生生不息个生命力，就像阿爸傳承个柿仔情。佢企到這坵土地，正感受著麼个係「少食多香氣，多食無味緒」个人情味。

¹ 袋落袋：音 toi' log toi' / toi log toi；裝進袋子裡。

編號 7 號

【來去坐巴士】蕭瑞琪原作

這日閒閒無事，想著當久無坐巴士了，揀日毋當今晡日，該斯來去坐莊頭巴士遶遶啊！

莊頭巴士主要係為著服務交通較毋利便个莊頭，分莊民出外辦事、睭病、買東西抑係去車頭盤車；無斯分學生仔有車好坐去學校讀書；乜做得分來莊頭个觀光客隨意遶奈。中型个莊頭巴士做得行過細條个路，去到較側角个所在服務。

一上車，一個頭那毛蓬白个老伯姆當好意講：「後背有位仔哦，煞煞坐下來。」一個中風个老阿伯，雖然手腳毋靈，毋過佢一路講笑科分大家人聽。還有一個精神無麼好个老人家，恬恬坐在車門脣，目聚聚仔睭等大家打嘴鼓。車仔駛到醫院門口，還緊講話个老阿伯摺老人家愛下車，老伯姆又開嘴講：「毋好緊講話緊下車，睭好勢來行。」司機盡有耐心等到兩儕下車了，正再過駛停動車仔。睭司機熟絡左幹右幹，一下仔鑽入細巷仔，一下又駛出大路頭，有時跔等鮮鮮溪水个大圳行，有時跔等青溜溜个田坵走，非常趣妙。

還有四個八、九十歲个長者，對美國轉來掛紙，跔跔來坐巴

士遶奈這又熟事又毋識个家鄉。佢兜去美國打拚了五、六十年，講个客話還當正板，毋過對緊變化个家鄉，印象已經濛痴濛痴了。好得司機毋單淨開車技術一等，乜係當湛斗个解說員。歸路紹介解說，四儕聽到緊領頭，煞猛摺頭擺个記憶和眼前睭著个風景連起來。有人講：「日久他鄉變故鄉。」但係對家鄉个感情，永遠會固在心肝頭，毋管在他鄉打拚，抑係在家鄉生活，都係為著愛分人生更加歡喜圓滿。

想著頭擺去外背讀書，放假愛轉屋下，坐个巴士都尖到撈撈个¹人，無位仔坐還毋打緊，下把尖到連扳都毋使扳，就企到壁磴轉較毋得²，斯跔等車仔搖去搖轉到下車。係毋係為著想轉一輪屋下，實在無恁大氣命恁樣摺人尖車。等到自家會駛車仔，斯當少坐巴士了。但係，換一隻無共樣个方式來出入，乜當心色啊！

來！來去坐巴士哦！

¹ 撈撈个：音 zad zad gai` / zad zad gai^；擠得滿滿的。

² 轉較毋得：音 zhan` gau` m ded` / zen^ gau^ m` ded`；不能轉動。

114 年全國語文競賽臺灣客語朗讀文章高中學生組（饒平腔）

編號 8 號

【月臺】周昱原作

「美濃山川，靚靚風光；醺醺茶香，四季飄揚；勤儉個人，煞猛耕耘；美濃之歌，唱盡鄉情。」美濃，係佢个故鄉，這位有醺醺個人情味，有親切、篤實个客家人。高中畢業來彰化讀大學，對毋識離開屋下恁久又恁遠个佢來講，屋下嘅變做佢深深个戴念，所以，寮日定著愛轉美濃。因為初下碼來到生份个環境，還言恁慣，更深夜靜在宿舍睡書个時節，總會恁想：「還有幾多日正做得轉去？」「再過幾日就做得食著阿嬤煮个菜了！」

月臺，係佢逐禮拜都會踏著个地方，毋過，歸鄉摺離鄉个月臺會分佢兩種當無共樣个感受。寮日轉美濃，坐兩點零鐘个火車轉到高雄，踏著月臺該下，總會有一種講毋出个感動，該係「佢轉來了」个歡喜；等到寮日結束，愛倒轉彰化个時節，爺哀送佢去到火車頭，雖然踏在共樣个月臺頂高，毋過，心情嘅係捨毋開腳，這係「佢又愛離鄉了」个傷心。

逐擺愛行入月臺个時節，阿姆總係含等目汁三交代四吩咐：「自家一個人在外背愛注意安全」、「在外背毋好摺人冤家、結冤仇」、「暗晡頭睡毋好蹬被哦」。頭擺摺爺哀共下戴个時節，

總係感覺阿姆當嘍嘍、當煩，所以，見擺聽著阿姆个嘍嘍聲，佢就會毋暢个應講：「好啦，斯愛講幾多擺呢？」這下想起來，試著自家實在當毋著，該句話應該一擺又一擺傷著阿姆个心。

離開爺哀出外讀書過後也正發覺著，原來阿姆个嘍嘍聲恁燒暖。老古人有一句諺語講：「爺娘惜子長江水，子想爺娘擔竿長。」這下正式分佢深深感受著，爺哀關心子女个心，遠遠超過佢兜對佢兜个關心，就算佢兜既經大了，在爺哀个心肝肚，永遠還係毋識大个細人仔。

老古人還有一句話講：「還生食四兩，當過死後祭豬羊。」爺哀單淨一個，跔等恁俚个成人長大，正發覺佢兜既經鬚茅鬢白了，做得陪佢兜个時間也緊來緊少。佢一定愛好好珍惜摺爺哀相處个時間，不管幾無閒、課業分人幾懊躁，寮日，定著愛轉屋下摺阿爸、阿姆、阿嬤做伴。就算有朋友湊佢出去寮，佢也會摺佢兜講：「敗勢啦！佢想愛摺寮日个時間留分屋下人。」

編號 9 號

【一領學生衫】黃美貞原作

該年个新冠疫情，對一群畢業生最大个遺憾，就係大家淨做得在線上講再見，無法度摺同學儕共下參加畢業典禮。

有一日，大學三年生个阿德收著母校寄來个電子信，講愛邀請同學轉去參加畢業典禮，正經係當有心。聽校長講，已多該屆个同學試著，無摺大家共下在禮堂唱畢業歌，在校園肚共下結胸花翕相，就無像畢業。有影，有緣做同學，有當多讀書、打拚、爽奈个心色回憶，係難得个情份，所以，學校特別安排在校慶該日，請大家著學生衫轉來參加典禮。

阿德有一隻習慣，係用毋著个東西，佢會遽遽處理忒，睺係回收抑係攞忒，所以佢个間房肚總係伶伶俐俐¹，無麼个舊東西。這擺，愛尋出三年前个舊衫，根本就係兔仔角烏龜毛——無可能个事情。雖然學校也有分大家方便个選擇，著白色个面衫、烏色个長褲就做得，毋過，大家還係會想尋轉該兜青春个印跡、珍貴个回憶。

做阿姆个人，就算俵仔無講，也揣得著佢个心思。佢先上網

去尋睺哪位有賣成功高中个制服，電話聯絡好勢。想著睺身係圓个，用講个毋當用比个，尺寸好勢還愛繡學號上去，黏時帶等阿德平常著个衫出發，一息都濫糝毋得，這就係阿姆个愛，點點滴滴，來為子女設想。

該日打早，阿德暢靈靈仔著等新衝衝²个學生衫轉學校，睺著三年無見著个同學，除忒歡喜還係歡喜。大家共下翕相、講笑、湊等去食晝，就像讀高中該下。還有同學問起：「阿德，你个學生衫仰還恁新，一息汗點都無？摺印象肚差當多呢？」知著係阿姆个用心了後，大家雖然試著已過頭，毋過，還係當欣羨，原來時行个儀式感就係恁樣形啦！

一領學生衫做得分俵仔留下恁好个回憶，實在當值，最重要个還分後生人了解，把扼機會創造回憶，該種價值係用錢斯買毋著个。

¹ 伶伶俐俐：音 lang lang li' li' / lang` lang` li li；乾淨整齊。

² 新衝衝：音 sin` chung` chung` / sin` cung` cung`；很新的。

【食飯个禮貌】曾雪蓉原作

有一句話講：「一方水土養一方人。」逐隻地方都有自家个文化還有習慣。在恁多个風俗裡肚，「食」个禮貌文化做得講係生活肚最重要个一部分。

還記得舊年，嫁去日本个滿姑，請佢兜歸屋下人去佢屋下遠寮。到了日本，食飯个時節，「山田」姑丈提起酒杯仔，湍一杯酒分阿爸，湍好以後，姑丈摺酒罐仔放在桌頂，就笑咪咪仔睺等阿爸，阿爸也對等姑丈緊笑緊領頭，兩儕人就恁樣笑等相對睺。過無幾久，滿姑發覺著就講：「大哥，日本人在淋酒个時節，係習慣愛互相湍酒。頭下山田湍一杯酒分你，你這下也愛湍一杯酒分佢啦！」滿姑講忒以後，佢兜正知原來係恁樣哦！阿爸煞煞湍一杯酒分姑丈，嘴町緊用日本話講：「請、敗勢」；這種「做人客」尊重主人傳承淋酒个規矩，佢想就係一種「食」个禮貌文化，也係老話「入莊隨俗、入港隨灣」个生活呈現。

「做人客」个時節，愛曉得尊重主人个習慣；該，「請人客」个時節，又愛仰般來做呢？

佢屋下有請印尼阿妹來搵照顧阿公，這印尼阿妹个名仔安到

「阿妮」。「阿妮」平常時盡煞猛，除忒照顧阿公，還會做衫褲。有一擺「阿妮妹」做一身盡靚个衫裙分佢叔姆，佢叔姆為著愛答謝佢，就請佢食飯。佢陪「阿妮」去隔壁叔姆屋下，坐啊下去，睺著桌頂有豬腳、豬腸炒薑絲，又有豬肚鹹菜湯，全係阿叔姆个手路菜，也係佢食慣个客家味緒，菜色正經盡豐沛。毋過佢叔姆一下無想著「阿妮妹」係印尼人，佢無食豬肉。佢行去灶下摺叔姆講煞，佢「唉喲」一聲，就遽遽炒別項菜兜上桌。佢黏時就想：「下二擺若講愛請人客，愛詳細注意人客敢有特殊个食飯習俗，正毋會好意變壞意來失禮。」

「食飯个禮貌」係一儕人好修養个表現，佢提醒自家在這方面毋好恁無用心，不管係分人請抑係請人客，定著愛做著「有禮有節」。